

आकाशवाणी

खास-खास खबरां:-

- केन्द्र सरकार नै असम ते नागालैंड च कच्चे तेल ते कुदरती गैस दी खोज ते उत्पादन आस्तै इक त्रिपक्खी ऐतिहासिक सहमति पत्र पर दस्तख्त कीते न।
- केन्द्र सरकार नै साइबर अपराधिये आसेआ सुरक्षा प्रणालिये दे इस्तेमाल दा पता लाने ते माली बवस्था गी निशाना बनाने दे बदधे खतरे बारे चेतावनी जारी कीती ऐ।
- विदेशमंत्री जयशंकर होरें आलमी बरादरी दा आहवान कीता जे ओह तनाजे दे असर गी घट्ट करने ते कूटनीतिक बवस्था परतिए कायम करने च टकोदी भूमिका निभा।
- अमरीकी राष्ट्रपति डोनाल्ड ट्रम्प होरें युद्ध समाप्ति गल्ल च थ्होई दी सफलता दा हवाला दिंदे होई ईरान पर नमें सैन्य हमले रोकी दिते न ।
- 10मां आई.सी.सी. महिला टी-20 क्रिकेट विश्व कप अज्जै थमां शुरु होआ रदा ऐ। प्रतियोगिता दा पैहला मैच मेजबान इंग्लैंड ते श्रीलंका बश्कार होग।
- FIFA विश्व कप 2026 दे उदघाटनी मैच च मैक्सिको नै दक्खन-अफ्रीका गी 2-0 कन्नै हराई दिता।

<><><><><><>

Centre MoU

केन्द्र सरकार नै पूर्वोत्तर दे 2 राज्यें असम ते नागालैंड च कच्च तेल ते कुदरती गैस दी खोज ते उत्पादन आस्त इनें दौनें राज्यें दी सरकारे दे कन्नै इक ऐतिहासिक त्रिपक्खी सहमति-पत्र पर दस्तख्त कीते न। केन्द्रीय गृह मंत्री अमित शाह- पेट्रोलियम मंत्री हरदीप सिंह पुरी- असम दे मुखमंत्री हिमंत बिस्वा सरमा ते नागालैंड दे मुखमंत्री हुंदी मौजूदगी च सहमति-पत्र पर दस्तख्त कीते गे। इस मौके पर शाह होरें आखेआ जे एह ऐतिहासिक पल ऐ। एदे च मुख्य च तेल ते कुदरती गैस दी खोज दी संभावना होर बदोग।

उन्हें आखेआ जे इस सहमती पत्र नै प्रधानमंत्री नरेन्द्र मोदी हुंदे समृद्ध ते विकसित पूर्वोत्तर दे सुखने गी साकार करने च इक बड़्डी रुकावट गी दूर कीता ऐ। शाह होरें आखेआ जे प्रधानमंत्री होरें 2014 च सत्ता संभालने मगरा गै पूर्वोत्तर गी अपनी तरजीह आहली सूचि च सब्बनै थमां उप्पर रखेआ ऐ।

<><><><><><>

#### Center Advisory Cybercriminals

केन्द्र सरकार नै साइबर अपराधियें आसेआ सुरक्षा प्रणालियें गी भेदने ते माली बवस्था गी निशाना बनाने दे बद्धे खतरे दे बारे च चेतावनी जारी कीती ऐ। गृह मंत्रालय दे अधीन भारतीय साइबर अपराध तालमेल केन्द्र आस्सेआ जारी चेतावनी मूजब साइबर अपराधी डीपफेक वीडियो ते नकली पंछान बनाने आस्तै A.I तेजिया कन्नै इस्तमाल करा'रदे न। इ'नें तकनीकें दा गलत इस्तेमाल चेहरे दी पंछान- जीवन प्रमाण पत्र- वीडियो KYC- खाते गी परतिए सक्रिय करने दी प्रणालियें ते माली ते डिजिटल सेवाएं तगर गैर-कनूनी तरीके कन्नै पुज्ज बनाने आस्तै कीता जा'रदा ऐ। सरकार नै फिनटेक कम्पनियें सनें सारे माली संस्थानें गी डीफफेक दा पता लाने आहली प्रणाली गी मज़बूत करने ते ग्राहक ऑनबोडिंग तरीके गी बेहतर करने दी सलाह दिती ऐ।

<><><><><><>

#### PM-NITI Aayog

प्रधानमंत्री नरेन्द्र मोदी होरें आखेआ ऐ जे अज्ज जिसलै केंई बड़्डी अर्थबवस्थां यक्को-तक्की ते आर्थिक चुनौतियें दा सामना करा'रदियां न- तां भारत दी विकास जातरा दुनिया गी गी लगातार प्रेरित करा'रदी ऐ। कल नमीं दिल्ली च राष्ट्रपति भवन च नीति आयोग दी गवर्निंग काउंसल दी 11मीं बैठक दी प्रधानता करा'रदे होई उ'नें देसै दे आत्मनिर्भर बनाने दे संकल्प गी होर मज़बूत करने दी जरूरतै पर जोर पाया ते आखेआ जे एहदे लेई आलमी सतह दिएं बेहतरीन बवस्थाएं गी अपनाएं जाने दी लोड़ ऐ। प्रधानमंत्री होरें राज्यें गी गुज़ारश कीती जे ओह “इक जिला- इक उत्पाद” आली पैहलकदियें पर चेचा ध्यान देन ते एह लक्ष्य हासल करने लेई असरदार रणनीतियां तयार करन।

<><><><><><>

Prez -Uttarakhand

राष्ट्रपति द्रौपदी मुर्मू होर अज्जै थमां 2 दिन दे उत्तराखंड दौरे पर रौहगंन। इस दौरान ओह देहरादून स्थित भारतीय सैन्य अकादमी च 158में नियमित पाठ्यक्रम ते 141में तकनीकी Graduate कोर्स दी पार्सिंग Out Prade दा निरिक्षण करडन।

<><><><><><>

Goyal Switzerland

उद्योग ते बपार मंत्री पीयूष गोयल होर अज्जै थमां 2 दिन लेई स्विट्जरलैंड दे दौरे पर रौहडन। इस दौरान ओह स्विट्जरलैंड दे राष्ट्रपति गाय पारमोलिन ते स्विट्जरलैंड दी आर्थिक मामले द राज्य सचिव हेलेन बुड लिगर कन्नै मलाटी करडन। गोयल होर Swiss दवा उद्योग दे प्रमुख प्रतिनिधिये कन्नै बी गल्लबात करडन। उद्योग ते बपार मंत्रालय नै आखेआ ऐ जे एह यात्रा दौने मुख्ये दी आर्थिक सांझेदारी गी मजबूत करोग ते भारत यूरोपीय मुक्त बपार संघ EFTA बपार ते आर्थिक सांझेदारी समझौते दी अमलावरी पर गल्ल गी सौकखा बनाग। यात्रा दौरान गोयल होर ज्यूरिख च Swiss कम्पनिये ते निवेशके कन्नै दपक्खी बपार ते निवेश विस्तार दे मौके पर चर्चा करडन।

<><><><><><>

EAM Finland

बदेश मंत्री डाक्टर एस.जयशंकर होरें इस गल्लै पर चैंता बुज्झी ऐ जे आलमी सतह पर जारी तनाजें करी चीजें दी लागत बधा करदी ऐ ते एहदे करी जेहड़े बदलाव होआ करदे न उन्दा असर कुसै इक खिते धोड़ी गै सीमित नेंई ऐ। बदेश मंत्री होरें एह गल्ल फिनलैंड च कुलतारन्ता वार्ता दे दरान फिनलैंड दी बदेश मंत्री एलीना वेल्टोनेन ते UAE दी सहायक बदेश मंत्री लाना-नुस्सीबेह हुंदे कन्नै गल्लबात करदे होई आखी। डाक्टर जयशंकर होरें आलमी बिरादरी दा आहवान कीता जे ओह तनाजे दे असर गी घट्ट करने ते कूटनीतिक बवस्था परतिये स्थापत करने च टकोहदी भूमिका अदा करै।

<><><><><><>

प्रधानमंत्री नरेन्द्र मोदी हुंदी अगुआई च केन्द्र सरकार दे 12 बरे पूरे होने दे मौके पर उत्तर-प्रदेश च अज्ज इक शानदार समारोह आयोजित कीता जाहग। राज्य दे मुखमंत्री योगी आदित्यनाथ बड्डलै लखनऊ च ते संजालै वाराणसी च आयोजित होने आहले कार्यक्रम च मुख परौहने दे तौर पर शामिल होडन। लोकसभवन च आयोजित होने आहले इस कार्यक्रम च अपना दल- SBSP, राष्ट्रीय लोक दल ते निषाद पार्टी सनें NDA गठबंधन दे सहयोगी दलें दे नेता ते मंत्री बी मौजूद रौहगंन। मुखमंत्री योगी आदित्यनाथ लोक भवन च सुशासन दे सिद्धांते प्रति समर्पित प्रधान मंत्री हुंदे आस्सेआ 140 करोड़ भारतीय दी 12 बरे तगर लगातार सेवा दे बारे च मीडिया कन्नै गल्ल करडन। ओह मोदी सरकार दे तैहत जन-कल्याणकारी जत्ने- बुनियादी सुविधाएं दे विकास ते भारत दी आस्था ते सांस्कृतिक विरासत गी सम्मानित कीते जाने दे बारे च व्यापक जानकारी देगंन।

<><><><><><>

#### Trump -Iran

अमरीकी राष्ट्रति डोनाल्ड ट्रम्प होरें युद्ध समाप्ति गल्ल च थोई दी सफलता दा हवाला दिंदे होई ईरान पर नमें सैन्य हमलें रोकी दिते न। एदे थमां पैहले ट्रम्प होरें धमकी दिती ही जे ईरान दे तेल उद्योग पर कब्जा करिए युद्ध गी होर बढ़ाया जाहग। सोशल मीडिया पर इक पोस्ट च ट्रम्प होरें ईरान दे उच्च स्तरीय नेतृत्व दे कन्नै होई दी गल्लबात च होई दी प्रगति गी इस अचानक बदलाव दी वजह दस्सेआ। ट्रम्प होरें एह बी सारत दिती जे नाजुक युद्ध विराम गी बदाने आस्तै चला'रदी गल्लबात च बी प्रगति होई ऐ। राष्ट्रपति ट्रम्प होरें आखेआ जे ईरान कन्नै युद्ध खत्म करने दा समझौता लगभग पूरा होई चुके दा ऐ ते मेद ऐ जे इस हफते दे अखीरै च दस्तखत कीते जाडन। ट्रम्प होरें एह टिप्पणियां कल व्हाईट हाउस दे ओवल दफ्तर च कीतियां। अमरीकी राष्ट्रपति होरें आखेआ ऐ जे ईरान परमाणु हथियार नेंई रखने ते नां गै खरीदने पर सहमत होई गेआ ऐ।

<><><><><><>

## Indian Seafarers

खाड़ी मुख्खे आले खिते च बने दे समुन्दरी सुरक्षा आले हालात दे मददेनज़र भारत सरकार अपने नाविके दी सुरक्षा जकीनी बनाने लेई भलेआं उच्ची सतह दे अलर्ट पर ऐ। बंदरगाहें- जहाजरानी ते जलमार्गे सरबंधी मंत्रालय नै इक ब्यान च आखेआ ऐ जे भारत ते बदेशी जहाजे पर सोआर सबने भारती नाविके गी सलाह दिती गई ऐ जे ओह तनाजे आले जलमार्ग थमां लंगघदे बेल्लै बड़े मते सोहगे-सतर्क रौहन। सरबंधत कम्पनिये गी बी आखेआ गेआ ऐ जे ओह समुन्दरी सुरक्षा मत्तल्लक नियमे दी सख्ती नै पालमा जकीनी बनान। केन्द्री मंत्री सर्वानंद सोनोवाल होंरे आखेआ ऐ जे सरकार खाड़ी खिते दे हालात पर लगातार तक्क रक्खा रदी ऐ ते हर इक भारती नाविक दी सुरक्षा जकीनी बनाई जाहग।

<><><><><><>

## Delhi -Fire

दिल्ली दे तुगलकाबाड क्षेत्र च अज्ज बड़डलै इक रिहायशी इमारत च अग्ग लग्गने करी 3 लोकें दी मौत होई गई। दस्सेआ जा'रदा ऐ जे अग्ग पार्किंग एरिया च लग्गी जित्थे किश मोटर साईकल ते स्कूटर अग्ग दी चपेट च आई गे ते फीह एह अग्ग पूरी इमारत च फैली गई। दिल्ली अग्निशमन सेवा ने दस्सेआ जे बड़डलै करीब 2 बज्जिये 25 मिन्टे पर खबर थ्होन्'गै अग्ग स्हालने आस्तै 8 गड़डियां भेजियां गेइयां ते 5 लोकें गी बचाई लैता गेआ।

<><><><><><>

## ED -Arrested

प्रवर्तन निदेशालय नै IDFC बैंक धोखाधड़ी मामले दी जांच दे सिलसिले च हरियाणा दे विकास ते पंचैत निदेशक दफ्तर च तत्कालीन Superintendent नरेश कुमार गी गिरफ्तार कीता ऐ। उने'गी रपे-पैसे दे हेर-फेर ते काले धन गी जायज बनाने आहले कनून PMLA 2002 दे प्रावधाने तैहत गिरफ्तार कीता गेआ। मामले दी जांच च IDFC First बैंक च हरियाणा सरकार- चंडीगढ़ प्रशासन ते 2 निजी स्कूले दे खाते सोयां 645 करोड़ रपे दी सार्वजनिक राशी दे गठन दा खुलासा होआ ऐ।

गिरफ्तारी मगरा आरोपी गी PMLA अदालत च पेश कीता गेआ- जित्थुआं उसी ED दी हिरासत च भेजी दिता गेआ।

<><><><><><>

#### Women T-20

10मां आई.सी.सी. महिला टी-20 क्रिकेट विश्व कप अज्ज थमां शुरु होआ रदा ऐ। टूर्नामेंट दा पैहला मैच मेजबान इंग्लैंड ते श्रीलंका बश्कार बर्मिघम च खेड्ढेआ जाहग। इक महीने तगर चलने आहली एह प्रतियोगिता इंग्लैंड ते वेल्स च आयोजित कीती जाहग ते फाईनल 5 जुलाई गी लॉर्ड्स क्रिकेट मैदान पर होग। भारतीय महिला टीम ऐतवारें अपने कट्टर प्रतिद्वंदी पाकिस्तान खिलाफ अपना अभियान शुरु करोग। हरमनप्रीत कौर दी अगुआई आहली भारती टीम इतिहास रचने दी कोशिश करोग ते अपना पैहला टी-20 विश्व कप खिताब जितने दा लक्ष्य रक्खोग। इस प्रतियोगिता च 12 टीमां हिस्सा लै'रदियां न।

<><><><><><>

#### FIFA World Cup

मैक्सिको सिटी च रातीं फीफा विश्व कप 2026 दी शानदार समारोह कन्नै शुरुआत होई। कल खेड्ढे गेदे उदघाटनी मैच च सह-मेजबान मैक्सिको नै दक्खन अफ्रीका गी 2-0 कन्नै हराई दिता। मैक्सिको आस्तै जूलियन नै 9में मिन्ट च पैहला गोल करिए अपनी टीम गी इक-सिफर दी बढ़त दोआई। मगरा राउल जिमेनेज़ ने 67में मिन्ट च दुआ गोल करिए मैक्सिको गी 2-सिफर दी बढ़त दोआई दिती मैच दौरान त्रे खडारिएं गी Red Card दस्से गे।

<><><><><><>